



**Hardik Pandya India A team
nungi ano masayatetsü**

**Taiwan nem prangbong injang
agütsütsüji US tejangraba lir: Wu**



NH-29 Patkai-Kohima lenmang tajungba akümtsü: Supongmeren Jamir

Kohima, September 26, 2026 (TYO): Küm ka ser tesadang nung National Highway-29 Patkai-Kohima four-lane renemtsü aser ita ka tsüngda Kohima-Mao (Kisama section) lapoktsü ta Lok Sabha MP S Supongmeren Jamir-i ashi.

Supongmeren-i ketdangsürtem, yimtsüng tanishirtem aser contractors den külemi lenmang mapatong aika sema senzüogo.

NH-2 four-lane road kübok Patkai stretch nung initial survey aser geological & soil studies shitak magiba agi iba mapatong inyakba nung khuretem ajurur ta MP Supongmeren-i ashi.

Tang revised plan ka renemer aser iba nung Patkai bridge atenli tunnel ka yanglutsü, apu ana yanglutsü aser ayong tsütsü road alignment melentsü ta pai ashi.

Iba mapa atema detailed project report (DPR) renemdar aser küm ka ser tesadang ka shi nung ang mapa tembangtetsü ta paisa ashi.

December hopta tetenzüklen tashi nung iba lenmang nung tunnels ana renemtsü imlar saka tunnel ka den apu ka yangluba nung mapang talangba agitsü ta Supongmeren-isa shisem.

Patkai nungi Pherima area

tashi 5 year permanent maintenance arrangement latetogo aser iba yagi 1-year maintenance arrangement melener. Iba mapa inyakba contractors dak tenük yoktsü aser mapa shitak meinyakra merenshitsü ta paisa ashi.

Kisama section nung contractors anati mapa inyaktsü, Mao tsütsü Hokolbar nungi mapa tenzükogo aser Kohima tsütsü Hombor nungi tenzüksü ta Supongmeren-isa metetdaksü.

Ita ka tsüngda lenmang nung gari senzütetsü imlar ta paisa shisem.

Kohima bypass atema mapa 20% tashi dang inyaka lir aser küm ana shi nung ang tembangtetsü akok. Centre dangi iba onük abentsü aser mapang züngzüka yur lenmang renemtsü merangtsü ta MP Supongmeren-isa ashi.

Delhi nung tendering process inyaker anungji bangdakpurtemi contractors shimdang 'ground-level conditions' reprangtsüla. Contractor kari tenders angutsü atema jenjang kanga ajema sayur saka parnoki subletting asüba agi highway projects inyakba nung khuret ajurur aser mapang atsülanger ta Supongmeren-isa ashi.

Ungma Village Council-i CNTC, TUN aser ENPO nem ali agütsü

Dimapur, September 26, 2026 (TYO): Ungma Village Council (UVC)-i Central Nagaland Tribes Council (CNTC), Tenyimia Union Nagaland (TUN) aser Eastern Nagaland People's Organisation (ENPO) teloktem nem ali tenlaogo.

Iba asoshi September 26, 2026 nü CNTC, TUN aser ENPO tenüng nung ENPUM ketdangsürtem Ungma-i aru. Rongpu Astro Turf nung Ao Senden, Village Council, ali tenlartem aser nübortem adenshia sentong ka agia liasü.

Iba sentong nung CNTC President Hukiye K. Yephthomi, TUN President K. T. Villie aser ENPUM President Y. Among Yimkhiung nungeri pelaba o jembi. Iba sülen Ao Senden General Secretary Imti Longkumer-ia jembi.

CNTC, TUN aser ENPO lennirtemi o jembidang Ungma Village Council aser ali tenla agütsürtemi iba otsütsü mapa inyakba atema pelaba metetdaksü.

Iba ya Nagaland putiotsü nung mezüngbuba inyakba mapa ka lir aser iba mapa ajanga telongjem, adianu ama alitsü aser kati ka angatetteptsü osang sangoktsür ta parnokisa ashi.

Block aseme kati ka angatetsü, akhümtsübuttsü aser yariteptsü aser ka ama inyaka aotsü. Iba ali ya amalitep tali adokba tesem ka asütsü imlar aser tali longjemshir nübortem asoshi mapa tajungtem inyaka aotsü ta parnokisa ashi.

Ali tenla agütsüba ya Nagaland nung adianutem tsüngda telongjem metsüjang proktsü merangba mapa ka lir. Tarutsü kümtem iba metsüjang ya tulu ka akümtsü imlar ta ali tenlartem-Imtidongba Jamir, Tatar; R. Nungshilepden Jamir, Tatar; aser Imtisungkum Longkumer, Tatar nungeri ashi.

CNTC nem Lanusuwa Semchir Jamir Clan, Imtidongba Jamir Tatar, TUN nem Shikiyangba Semchir Jamir Clan, R. Nungshilepden Jamir, Tatar aser ENPO nem Sentirongba Semchir Longkumer Clan, Imtisungkum Longkumer, Tatar ajanga ali tenla agütsüogo.

Ali ya kidongtem shimteta agütsürba masü saka lottery system ka ajanga agütsür ta metetdaksü.

CNTC, TUN aser ENPUM-i Ungma Village Council, ali tenla agütsür kidong asem, Ao Senden aser iba sentong nung adener ajak dang pelaba metetdaksüogo.

Mokokchung DC-i nüburtem dang amaliteptsü ayongzüker



Mokokchung, 26th Sept (TYO): Tawa tanü Mangkolemba nung nisung kar mim aketba yi jemer asü südi ta temulung melemteti bilemba dak sentakba nung 26th September nü Mokokchung Deputy Commissioner, Ajit Kumar Verma, IAS-i osangbener senden ka DC Conference Hall nung ayongzüka liogo.

Pai iba senden nung jembidang, Mangkolemba tatalokba dak sentakba nungi tenzüka Mokokchung district atema administration aser police-i nüburtem kümzüka ayutsü asoshi tim teinyaktsü mera agia inyakdaki, anungji, nüburtemi imlibilema bandak den amalitepa yaridaktsünür, ta ayongzüka metetdaksü.

Iba maparen dak sentakba nung tanü Aor lokti tulutiba Ao Senden, Watsü Mungdang, Ao Kaketshir Mungdang (AKM), All Ward Union Mokokchung (AWUM), town temeket aliba yimtsüng pezü nungi yimden yimsüsürtem aser tapet department nungi ketdangsürtrem jatepa mensem ka menogo. Iba mensem nungji teloki nübur taküm kümzüka ayutsü asoshi Mokokchung district nung yi noktangba mapa nung külemi amalitepa aser yaritepa inyaktsü bangjemtepa

liasü, ta Mokokchung DC-isa metetdaksü.

Iba ya asenok asoshi tetsübuttsü aser taoksatsü mapang ka lir, anungji, nübur ajaki iba ya kanga süoki ia agidaktsünür. Talisa arogo tenzüker aser lokti tentet balala lenirtemi tang mapang ya yi nungi pila-a alitsü asoshi nüburtem nem tangatetba agütsüdaktsünür, ta paisa mepishia ashi.

District administration den külem sür tawa tanü police-i Mokokchung HQ den Mangkolemba, Tuli aser Changtongya town nung yi ayokba tesemtem meita aoba mapang yi ayoker kar den parnok ket nungi yi kar pua lir. Iba den tasür parnok pezübo post-mortem agiogo aser pur aliba yitemji tendangtsü atema Guwahati-i yakta yoktsü, ta Mokokchung Sr. SP Vesupra Kezo NPS-i teinyakdak mapa kar lemsatop.

Iba maparen dak sentakba nung tatongi bushisüngdangtsü atema Special investigation Team (SIT) ka Mokokchung Addl. SP tokolak sür shima mapa tenzükogo. Aji oda, bushisüngdangba mapa tang ang tenzüker asünung, kuli ajakbo nguteta mali saka kodang item ajakji tembanga arudir idangji

dang ajak metetdaksütsü, ta paisa shisem.

Joko taküm mesamadaktsütsü merangtsü aser yi ayokba, belenba aser rizüngbatem sashisashia reprangtsü, anungji, item mapa takok ngua inyaktsü asoshi lokti tentet balala den nüburtemi bangdak den amaliteptsü mepishir, ta paisa nenshia metetdaksü.

Tang tensa nung ya, nisung kar danga yi ajemba sülen talisa ghonda 48 tsüngta mangmanga akümba, tenük agi junga mengui akümba, tango sashitsü timtem ajuruba, saksünüa aitba, tepok nung tashiba mesüra süchia aoba amala timtem ajangshira, takaratiba nung anasatiba primary health unit bushia oa teyari agitsüla aser iba den külemi pei anasa aliba ketdangsürtem nem takaratiba nung osang agütsütsüla, ta Mokokchung DC-i yokba tanga osang ka ajanga metetdaksü.

Maneni yi belenshiba aser ayokba dak sentakba osang kar danga lira, teküboklen agüja aliba Number - 6009828769 (Mokokchung), 7005675868 (Mangkolemba) aser 7005512093 (Tuli) nung osang agütsütsü mepishir ta kasa sangdong nungsa metetdaksü.

NPF-i town, municipal council züngsemtem mesüzüker: NPCC

Kohima, September 25, 2026 (TYO): Naga People's Front (NPF)-i town aser municipal councils nung Congress aser tanga party züngsemtem mesüka anir aotsü meranger ta Nagaland Pradesh Congress Committee (NPCC) -i tai tongloksüogo.

Congress aser independent züngsemtem nem mezüngbo facilities magütsü aser NPF nung dendaktsütsü atema rongshi ta NPCC president aser Lok Sabha member S Supongmeren Jamir-i ashi.

"NPF sorkari mapa tamajung inyaker. Parnoki town councillors aser municipal councilors anir aotsü tenzükogo" ta pai ashi.

"Ibala mapa ajanga voters-i shimteta tashi ajembanger aser councilors-i talenba melii par nübortem asoshi inyaktsü azüoka ayur" ta Supongmeren-isa metetdaksü.


Züngsem kari NPF nung adenba aitsür kechiyong parnoki senotsü angutsü mechi nung elections mapang voters-i parnok shimba senzüka

yutsüogo ta paisa ashi.

Iba inyakyim ya odang inyaka ora asen state nung municipal aser town councils nungi tenzüker ketdangsübaren tajung angutsü teimla mali akümer ta Supongmeren-isa shisem.

September 25, 2026 nü Kohima nung Congress Bhavan nung Nagaland Pradesh Congress Committee (NPCC) ketdangpurtemi osangbener den sensaksem dang NPCC Predsident aser Lok Sabha MP Supongmeren-i pai iba onük jembia liasü.

Angh Kishore Yadav-i kaket ana sayatsüogo



Angh Kishore Yadav-i kaket sayatsüba mapang tangokba noksa angur.

Dimapur, Rongjui/September 26 (TYO): Nagaland Angh aser North Eastern Zonal Cultural Centre (NEZCC) mendenbuba Nand Kishore Yadav-i, Alok Kumar Kanungo aser Dr. Alino Sumi nati züluba "Nagas: The Knowledge Practitioners" aser Sentila T. Yanger-i züluba "Textiles - Threads That Weave Stories" ta kaket ana sayatsüogo.

Kaket ana ya Honibarnü NEZCC Headquarters, Chumoukedima nung sayaja liasü.

Sentong nung o jembiba mapang Angh Nand Kishore Yadav-i, kaket ana ya onük balala nung ajemdaker züluba süaka iba ajanga Naga nung sobaliba senmang aser shisatsütem nüburttem nem metetdaksüogo, ta ashi. Paisa, kaket anaprongla yagi putu ka nungi ka ta shisatsü, inyakyim balala asüngteta belentepa aruba ya koda tongtimbang aji sayur ta ashi.

"Nagas: The Knowledge Practitioners" kaket indang jembiba mapang Angh-i, sobaliba shisatsütem ya tar nung otsü ama dang magitsüla, saka kanga junga asadanga ataba, tajangshiba, inyakdangba, angazüka inyakba ajanga renlokyonga arubatem ama agitsüla ta ashi.

Pai ashiba agi, aluyimba, teka mapa balala, technology, arem, ali rongsentem, külemküja aser osettsütem dak sendakba sobaliba shisatsütem yagi kin balala nung sisatsütem renloka aruba sayur.

Angh-i, Naga nung senmang wazüka ayuba ya osettsütem wazüka ayuba dak dang metembangtsüla, saka item dak sendakba shisatsütema wazüka ayutsüla, ta ashi.

Naga textiles kaket indang jembiba mapang Angh-i, Naga nung tabentsü sü ya sü ka dang masü saka iba ya Naga nung maitsü, tesüiba mapangtem bilemtetshiba, tetzü aketba aser teka mapa jungkai adoka sayuba lir ta ashi. Pai, sentsü, patterns, motifs aser sütakba yimya ajak ajanga kin balala shisatsü aser sobaliba renloka aoba sayur ta ashi.

Maneni pai sobaliba shisatsütem kanga junga mangaoka ayutsü koda tongtimbang iba indang lemsatepba den, item ya mangaoka ayuba ajanga bushisüngdang, kaketshirtem, artisan tem, museum tem aser tarutsü putu nem teyari agütsütsü, ta ashi. Paisa, item inyakyimtem tenzüka kintem tejangraba kanga junga asadanger aser parnok nem tagütsütsü tim agütsüba sülenang mangaoka ayutsü nüngdaker ta ashi.

Sobaliba shisatsü ya tanü putu nunga koda tapet iba indang jembiba mapang pai, tochnology renloka aoba mapang sobaliba sama modaktsütsüla, ta ashi. Pai, lanurtem dang modern education aser technology sülen anidaktsü aser kanga mapang nung pei kin indang sobaliba shisatsütem angatetsü merangsü ajungshia liasü.

Angh Yadav-i, tzü mopung

melenshiba, arem shirur aser süngtonglitong wazüka ayuba, sustainable aluyimba, ali rongsen shisa kaa amshiba aser libaliro amala nung sobaliba shisatsütem yagi tanüa teyari tulu agütsütsü akok ta ashi. Pai, tayongzükba ya sobaliba aser modernity na tsüngda ka shimtsüba masü saka ana ya longjemdaksütsüba ya lir, ta ashi.

Angh-i kaket zülurtem aser parnok nem teyari agütsürtem nem tenüsang agüja liasü.

Sentong nung lokti pela agizükba o jembiba mapang Director, NEZCC, Alobo Naga-i, Naga nung shisatsü, sobaliba aser craftsmanship mangaoka ayutsü atema kaket ana ya kanga senti lir ta ashi.

Paisa, NEZCC-i, shisashir, artists aser sobaliba wazüka ayurtem nem sobaliba shisatsü, inyakyim balala mangaoka ayutsü atema teyari agüja arudar ta ashi.

Maneni sentong nung kaket zülur Alok Kumar Kanungo, Associate Research Professor (Archaeology), Department of Humanities and Social Sciences, IIT Gandhinagar, Dr. Alino Sumi aser Padma Shri, Sentila T. Yanger nungeria o tatsütsü jembia liasü.

Sentong nung Lotha ki tenüng nung Woniro Von, Ao kin tenüng nung Eklavya School aser Nagaland Bhojpuri Samaj, Dimapur nungeri presentation kaka agüja liasü. Sentong ya Assistant Director, NEZCC, Tamsunaro-i tepela o jembir tembanga liasü.

Opang Jamir-i atenba 'Senti Naro' ken sayaogo



Noksa nung "Senti Naro (Precious Flower)" kentener (L-R) Lima Mongro, Opang Jamir aser Wabangtoshi Jamir nung tangokba angur.

Dimapur, Rongjui/September 24 (TYO): Opang Jamir-i atenba "Senti Naro (Precious Flower)," ken pa indang official YouTube channel OpangJamir nung September 25 nü sangdongogo.

Opang Jamir shiba Nagaland nung amendaker aliba kentenba telok Avancer indang frontman asüba ajanga ajaki meteta lir, pai maneni ken

mejema tendar aser iba ajanga kentener ka ama pa maneni renloka aoba sayur.

"Senti Naro (Precious Flower)" ken ya Ao oshi nung atenba ken ka lir. Ken ajanga temeimer ka ya senti naro ama sayur, shiba anepasa ajanga alinük ajunga tebor jungdaksür. Iba ken yagi nisung ka tanüla koba ajanga tesangwa bener arutsür aser taküm

lemladaksür, parnok tushir.

Maneni ken ajanga tsüngküm mongpu ajak nung asen metoktsüi nokdaker ka indang jembir. Iba ya temeim indang dang masü saka manokshitetba tenangzükba indang lir.

Official audio/video ya YouTube nung kin balala nungi nüburttem nem ken angaba mapang teyari agütsütsü atema English translation keter angutsü.

Ken ya Jongpongtemsü Longkumer, Opang Jamir, aser Vitz Zhimo nungeri mejem aser Vitz Zhimo-i produce süa liasü. Ken ya Opang Jamir, Vitz Zhimo, Lima Mongro, aser Wabangtoshi Jamir nungeri perform asür aser Sentilong Yaden (SKY)-i direct asüba den paisa project ya edit süja liasü.

Chümoukedima nung Lok Kalyan Mela ayongzük

Dimapur, Rongjui/September 26 (TYO): Sorkar-i teyari scheme balala agütsüba nung yariteptsü nükjidong nung Lok Kalyan Mela ka Deputy Commissioner, Chümoukedima indang office nung September 24, 2026 nü ayongzüka Prime Minister's Street Vendor's AtmaNirbhar Nidhi (PM SVANidhi) scheme nung rangloker agia liasü.

Additional Deputy Commissioner and Executive Officer, Chumoukedima Town Council (CTC), Lemlila Sangtam, NCS-i iba sentong nung jembidang sorkar indang schemes tem indang-indanga temsüa aliba beneficiaries dangi bener aotsü aser nüburttem item teyari agitsü asoshi lenmang shidak sayua yaritsü tongtipang lir ta ashi.

PM SVANidhi scheme yagi temsüa aliba street vendors nem collateral-free working-capital loans agütsür. Iba loan structure

kübok mezüng sen 15,000 tashi agütsür aser mapang shidak nung mezüng loan menokmar nem sen 25,000 tashi agütsür.

Business tali ulushinüa aliba vendors nem asemben buba nung sen 50,000 tashi loan agütsür.

Iba scheme yagi mapang shidak nung menoker nem küm nung interest subsidy shilem 7 tashi agütsür. Iba den incentives agüja digital transactions amshitsü ajungshir aser temsüa aliba beneficiaries temi UPI-linked RuPay credit card teyari agitetsü.

Lok Kalyan Mela ya outreach sapang ka ama lir, koba ajanga temsüa aliba vendors den loan application, bank linkage, digital payment onboarding aser QR-code facilities nung yariteper.

Iba den Central aser State sorkar indang welfare aser social-security schemes balala indang awareness agüja liasü.

Chumoukedima nung Flash Mob Awareness sentong agi



Dimapur, Rongjui/September 26 (TYO): Solid Waste Management Rules, 2026 sülen anidaka aser Swachhata Hi Seva amungba nüngdem nung Chümoukedima Town Council (CTC)-i September 26 nü awareness sentong ka ayongzüka agiogo.

Iba sentong ya Saturday Market, Jack & Jill Shopping Mall, aser CT Square ta tesem asem nung agi, kong Chumoukedima Dance & Fit Studio kaketshirtemi flash-mob performance ajanga tangazükba agüja liasü..

Jana kanga junga bendanga entoktsü aser Solid Waste Management Rules, 2026 sülen tashi anga anidaktsü atema nüburttem nem tangazükba agütsütsü asoshi nüburttem tali atsüa arutsü nükjidong nung flash-mob ya ayongzüka liasü.

Ken aser tsüngsang den osang balala ajanga kaketshirtemi jana kanga junga bendanga entoktsü aser anogoshia libaliro nung sustainable waste-management yimya benshitsü atema nüburttem ajungmesogo.

Sentong nung o jembiba mapang ADC (HQ) aser


Executive Officer, Chumoukedima Town Council Lemlila Sangtam-i, solid-waste management ya nüburttem khuret ka kümdaktsütsü nükjidong nung iba sentong ayongzükogo, ta ashi. Laiza, SWM Rules takok ngua benoktsü atema lisopur ajaki shilem agitsüla aser teka amteper inyaktsüla ta shisem.

Maneni Lemlila-i, jila mereka ayutsü atema ajaki longjemer inyaktsü koda tongtimbang iba indang lemsatepba den "Polluter Pays" principle sülen tashi anga anidaktsü nüngdaker ta ashi. Iba inyakyim kübok alima menentsürtemi khuret abener.

Iba sentong ajanga, jana bendena entokba dang masü saka tazüng nungi jana kanga junga bendanga entoktsü, jana tajemba kümdaktsütsü aser janatem kanga junga entoktsü atema nüburttem ajungmesotsü meranger.

Chumoukedima Town Council-i lisopur, commercial establishment, riju balala aser ken o dak sendaka alir ajak dang Chumoukedima jila merek mereka toktsütsü atema teka amteper inyaktsü ayongzükogo.

PM Modi densema lenirtemi Manmohan Singh nem tetushi agütsü



Rural Development & Panchayati Raj and Drinking Water Minister, Rabi Narayan Naik-i, district ajak aser gram panchayat ajak nung nüburtemi shilem agibaji ajanga state nung aliba nüburtemi alima wazka ayutsü atema telemtetba agia inyakba sayur, ta metetdaksü.

Iba sentong nung ABPF Pastor aser Associate Pastor tem ajak medema atentsü maneni metetdaksür. Iba den amangbapur ajaki iba sentong asoshi sarasadem nung kanga dang nungita yaritsü mepeshia ayongzüker.



TIR YIMYIM YIMOBILEM (EDITORIAL)

DIMAPUR SUNDAY, SEPTEMBER (RONGJUI) 27, 2026

Ajemalurtem

Alima tsütsü bilemdangbo ajemalurtemji tebur saka lapi, anungji yimten aser lokti nung tagidak makaba purtem amai asenoki bilemer. Ajisüaka, Yisuiبو ajemalurtemiang alima senmang amangtsü ta Mathi 5:5 nung shia lir. Aji oda, Yisui bilemba o asenoki bilemba naji amsa-am itta lir. Asenokibo alima senmangji terakzür meyong ta bilemer saka Yisui ashir, alima senmangji tashiyim amshia aseni aginüba rakzüka amangba agi mamangtetsü. Aji oda, Yisui tsüngdang ajemalurtemji alima tsütsü lapilarartemji masü mesüra tashimait aser tasümaitertertemjia masü. Yisui ashiba ajemalusangji arem shiti mesük, paji tashi kanga tait aser tasüa tait, pai kecha metsübur, ajisüaka kodang nisungtemi paji pua bener arua azüoker, nisung meyirijangia makoktsüba tashi aser tasü tait shiti to pa pua abener arua azüoksang kibur tsüngdang kanga ajemalua akümer. Iba shiti to kasa arem shiti, tesashi aser tetsübuttsü mit aketba shiruru, ajisüaka kiburi azüok nungji kiburi ashi anga ajemalua alir. Iba kasaji, ken mapang kabo asenoka nisung tesü, tamajung aser samaro, ajaki tsübuja reprangba nisung ser alitsüa akok, saka kodang Yisui asenok apu aser tanüla temeshi nem asenok azüokdaksü, asenok taküm to akhi memesük tesangwa, taremsük, kumli tajung aser tejungnü nisung akümer. Akhidang, kecha masü nung ain adoka tangar yiruja aliba nisung to tangbo tangar ain adokdang madoker, tangar jashidang mejashir, kumli tasü kümer Tsüngremi mulungba nung dang jajar, kechiyong Tsüngremji dang pa taküm nung kibur ta pai angateta lir aser iba kibursang tashi jagi pa azüoka lir. Aji oda, ajemaluba tetezü asenoki asen temeten bushia tangar den metokteper saka Tsüngrem nem dang toktsür. Ajemaluba tetezü tanüla temeshi nem dang asen taküm aser mapa ajak bendanga agütsür. Aji oda, ajemaluba tetezüji talangka aremsükba aser asen mulung masü saka kibur mulung südaktsüba taküm yimya aser jakliro lir. Mosa kanga ajemaluba nisung liasü. Aji oda, Israel nunger amang agi sangwa küma arem aser lisem lima ajanga anir aruba Mosa dangji asenoki lapi ajatsü asü. Mesüra, ain adoker ozüng longpak jaksaa endokba nisungji lapi asü ? Nisung tsütsü paji teburchi aser samaro. Ajisüaka, Tsüngremi azüokba agi ajemalu nisung aküm. Aji oda, Yirusalem tenla ki menenja shishilembartem aser sen melenertem mena aliba menden meküpkokja aina adoksang Yisui Khrista dangji asenoki lapi ta ajatsü asü ? Pai pa arishir dang kecha mashi. Kangki nung angenloktsüba mapanga Pai kotak nungi kotak tenyar meyi aika jakzüker Yihuda nungertem to ajak pua yuteta liasü, saka Pai aremsük, kechiyong yamaji inyaksübaaji tebui memulung. Aji oda, Yisui ajemalua Yihuda nungertem nem kangki nung agenloktsüba ajanga Pa tashi tuluba nung shia aru. Iba jagi tanü asenoki Pa külemer. Pai alima aser kotak senmang amangtsüsa ajemalua pa taküm bendanga agütsü. Tanü asenok akümlirtem dang ajemalua lira, alima senmang amangtsü ta shia yutsüba Tsüngrem o ji tiyazü masü. Nai tendanga tangar dang aremsükdangang, o tamajung tejembü, mapa tamajung teinyak, Tsüngremi mulungba bushiang aser aji inyakang. Atangji, alima nung ali senmang ajakji angutsü. Mathi 5:5 nung nangzüka senmang yabo ali shi taküm ya süitemer amangtsüba kotak senmang indang ashiba masü, saka tang akümüli nung amangtsüba ali rongsen indang ashir. Na teburchi aser samaro ta Tsüngremi meteta lir. Na tesangra, shisataka aser tasütait tetsür ta Tsüngremi meteta lir. Ajisüaka, Laishibai ashir, alima nung ali senmang amangtsüsa takar akümtsüba ya tasü aitba agi masü mesüra shisa akaba agia masü, saka ajemaluba agidang amangtsü. Tetezü, ajemaluba ya rongsen aruba lenmang aser iba lenmang nungi anguba rongsenjibo asen senmang asütsü. Ajisüaka, tekümdangtsü kaji samaro mapa inyakba agi mesüra asenok shisa akaba kija agi anguba rongsentemjibo asen senmang masütsü. Ibaji aseni ngua samatsü. Alima senmang amangnura, Laishibai ashir, AJEMALUANG.

OLEMSABANG

SORKAR DAK DANG MEMETALOKI PEI SASA MERANGA INYAKTSÜLA

~ L.Kika Pongener.

Tanü putu nung lanur tazünger ajunga ata-a sorkar mapa angutsü tamakoktsü kümogo. Anungji lanur tazünger ajaki Diploma aser Degree azüngtsü tenzükdangyongi; sorkar mapa ngur itasen chia alitsüba kisung nung rangloker masü; saka pei azüngba Certificate-ji ammer; pei angazükba nungji ajemdaker; pei sasa meranga inyaka tepok sunga litettsüsa; mapa tenzüka inyaksüla. Aji oda, Diploma & Degree tulu ngua zünger sorkar mapa mongura kazüa dang alitsüba aser tsürabur nem timtem agütsütsüba masü; saka pei sasa meranga inyaka pei dang masü, tangar nema mapa agütsütettsüsa, pei azüngba lenmang nung mapa tenzüka inyaksüla. Anungji lanur tazünger ajaki, sorkar mapasa mongu-aka; pei sasa mapa kabosa tenzüka inyaksüla. Ano tsüraburtem-ia pei chirnurtem sorkar mapa inyaksüba dang ajungshira; ibajibo tai tesayuba asütsü aser pei chirnurtem tia raksatsür asütsü. Tang asen lima nung Board of School Education aser University level tashi nung Diploma aser Degree azüngba nung; pei sasa mapa tenzüka inyaktettsüsa 'Skill' angazükdaksür asü mangazükdaksür (?) School Education aser University Curriculum aser Course nung ibaji dena lir mali (?) Aji kanga tongtipang lir. Kodang kaketshir ka School, College aser University nungi Diploma/Degree ngua renemtetdir; sorkar mapa-sa mongu-aka; pa/laji pei sasa mapa langkabosa inyaktettsüsa angazüka renemtsütsüla. School, College aser University Course & Curriculum nung itemji dena alitsüla.

Kechiba asen Naga nunger lanurtem-ibo sorkar mapa (White Color Job) dang bushir....??? ta aiben shisadanger....??? Zünger sorkar mapa kecha mongura tsürabur aser adianu nem timtem khuret agüja amajok nung mapang entoka kazür....??? Diploma & Degree tulu ngua azüngbaji kazüa alitsü azüng masü; pei sasa mapa langkabosa inyaktettsüla. Ano asen lima nung mazüngertem-ia inyaktetba mapa aika nangdaka lir sernung azümesenba agi meinyaknur dang. Asen Naga nunger dak aibelena angatetba kaji, Degree tulu ngua züngerbo; sorkar mapa nung mapa meinyaki itasen tulu chia alitsüla....ta aibelena angatetba temesu shisatsü ya endoktsüla. Taxi driver aser Auto-Rickshaw driver....Iba amala mapa ya kanga tuluka mazüngertemia inyaktettsüba mapatem lir. Asen Naga nunger lanurtem karibo meranga anishiba ngua kanga pelar, saka teimba ka tsümartemi dang anishiba angur. Ano tangpo asen Naga nungera lanur aikati Two-Wheeler Taxi anishiba ngua kanga pela-a repranger.

Arem min nung mesura moapu nung anu tatsük aser tsünglu agi aja-a sungtem-longtem mapa inyaka hajira aoba dang nungibo; itemji anishiba kanga agi tajungba asütsü. Tanga mapa nung hajira aotsü atemabo anogoshia-bo mangutsü, saka Taxi aser Auto Rickshaw anishibajibo anogo shia medangdangi hajira angutsü. Aji oda, iba mapa nungji maka-maiter shirnok pei sasa tenzüka inyaksü tashi mali, parnok nemji-bo akokba tashi Sorkar-i Loan & Subsidy agüja nungita yaritsüla. Ano takoktsü lenmang dang lira; arogo tulu aser takar arogotemibo pei arogo nung aliba lanur kar nembo loan aser teyari agüja yaritsüla. Tang shiyunga aruba amaji lanurtemi Bank nungi loan agir Car aser Autorickshaw alir pei sasa amshinungbo kanga tajangzüka asütsü. Asen Naga nunger lanurtemi akok tashi azümesena meli-i asentsü sena pei sasa mapa meranga inyaksüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Nigeria nung minute 86 shia Khristan kabosa tepseter: ETP



August 01, 2026 nü Nigeria nung Kaduna state kübok Naridon yim dak Khristan 27 atema külem asüpila sentong agidang tangokba noksa nung angur.

September 26, 2026:

Taküm January 1 nungi tenzüka September 8 tashi nung Nigeria nung Khristantem tepsetba asadanga, iba linük nung minute 86 shia Khristan kabosa tepseter, ta US nung aliba telok kati metetdaksü.

Taküm January 1 nungi tenzüka September 8 tashi nung Nigeria nung Khristan 4,216 tepsetogo, aser Khristantemji teimbaka aluyimer Khristantem lir aser Khristantemji telok balalai yimsü nung ajemdaker tepsetba lir, ta ETP report ajanga metetdaksü.

Nigeria nung taküm Boko Haram aser Islamic State West Africa Province (ISWAP) nati Khristantem tepsetba dang nungibo Fulani teloki Khristantem teimba tepset, ta Equipping The Persecuted (ETP) teloki metetdaksü.

"Crisis in the Middle Belt: Religious Persecution and Security Failure in Nigeria" ta ajaba report nung yamai shia lir, Nigeria nung kin mesüra yimsü nung ajemdaker rara ajanga nüburtem aika kongshir; yimsü nung ajemdaker aluyimer Khristantem tepsetba nokdangtsü atema asalentong junga yanglutsüla, ta ETP-i metedaksü.

Taküm September 8 tashi nung Khristan 4,216 tepsetbaji anogo shia Khristan 16 tepsetba mesüra minute 86 shia Khristan kaka tepsetba lir, ta parnoki metetdaksü.

"Ali, rongsen mesüra kin maitsü nung ajemdaker mangatettep adoka rarabaji majung, ajisüaka asalentong yanglur yimtsüngtem nung nütsüng ajak meshimeshia samatsütsü atema inyakba yabo balaka," ta report nung

shia lir.

"Equipping The Persecuted aser TruthNigeria nati bushitetba agi, yimtsüngtem amakba, Tenla kitem rongdoktsüba aser nüburtem jenshiba yabo yimsü nung ajemdaker amakba ajanga lir," ta report ajanga metetdaksü.

"Nigeria tesem ajaklen kin, ali aser yimsü nung ajemdaker mangatettep adoker aser rara-a adoker. Ajisüaka yimtsüngtem amakba, Tenla kitem rongdoktsüba, nisung jenti tepsetba, puer aoba aser akhidang nungi aliba li nungi aluyimer Khristantem meindokba tatalokba aika lir," ta ETP-i metetdaksü.

"Benue, Plateau, southern Kaduna, Nasarawa aser Taraba state tem nung Khristantem atema amokmeren tulutibaji Fulani militant networks lir ta TruthNigeria aser Nigeria Terror Tracker report ajanga jangjaogo," ta parnoki metetdaksü.

Equipping The Persecuted-i, Nigeria nung Khristan million 5 dak tali jenshiogo aser Khristan yim 600 dak tali raksatsüogo mesüra samatsüogo, ta metetdaksü.

ETP indang Nigeria Terror Tracker (NTT) ajanga bushitetba agi, 2025 aser 2026 kümtem nung Boko Haram aser IWAP telok nati senteper Khristantem tepsetba dang nungibo Fulani teloki tepsetba teimba.

Yaküm January 1 nungi September 7 anogo tashi nung Fulani teloki Khristan 4,932 tepset aser taküm January 1 nungi September 7 tashi nung Khristan 786 tepset.

Yaküm Boko Haram aser ISWAP nati senteper Khristan 1,958 tepset aser

taküm telok anati Khristan 189 tepset.

Observatory for Religious Freedom in Africa (ORFA)-ia Khristantem tepsetba shilem 53 bo Fulani teloktemi lir aser Boko Haram o ISWAP nati senteper Khristantem shilem 8 tepset, ta kasa report ajanga metetdaksü.

September 10, 2026 nüa Benue state kübok Ayilamo nung Khristan ter tepsetogo.

"Khristantem tepsetba aser puer aoba ajanga aikati tetsübu nung pei talidak toktsür ajener. Kodang Khristan kibongtemji relief camps mesüra temporary settlements nung jenoka lidir prangpong amer telok balalai Khristantem meyong kiojen, alu aser yimtsüngtemji agiadoker," ta ETP-i metetdaksü.

"Parnok nem teyari balala agütsütsüji tongtibang aser nüngdak, ajisüaka parnok tanaben pei kidangi meyipa oa lidaktsütsü atema inyaktsüla," ta report nung shia lir.

"Khristantem amakba tatalokbatemji jungjunga bushisüngdangtsüla, commanders, raraba hadir agütsürtem, senotsü agi ozüng alema inyaker yarirtem, intelligence osang metetdaksürtem aser ozüng alema inyaktsü atema yarir ketdangsertem a n e m a bushisüngdangtsüla," ta report nung shia lir.

"Emergency teyari agütsüba dak alia nüburtem kümzüktsü atema security agütsütsüla, jungjunga bushisüngdangtsüla, aibelenertem nem temerenshi agütsütsüla, takoksa angurtem nem kiojen meyipa agütsütsüla aser jenshia alirtemi timtem kecha majurui pei kidangi meyipa oa litettsüsa inyaktsüla," ta report nung shia lir.

"Nigeria nung puer aoertemji aiben reshikangshir aser chiyungtsü magütsür. Ano tetsürtem dakbo tim mesüi benshir. Teburtemji aiben sepai ama tenzükdaktsütsü atema anir aoer masü. Parnok dak azüker, reshikangshir, kangshia mapa inyakdaksür aser parnok chioaktsü atema sen akhanger," ta ETP-i metetdaksü.

ETP-isa Khristantem tepsetba aser puer aoba nokdangtsü atema Middle Belt nung Fulani militant networks raksatsütsüla aser Boko Haram, ISWAP aser tanga telok balala mita aotsüla, ta metetdaksü.

ANO GO ABEN TSÜNGREM DEN

KENTENER TSÜNGREM!

"Kibuba ne Tsüngrem tashi tulusangi ne nem takok agütsütsü ne den lir, tepela agi pai ne madak pelaseta alitsü, pai pa temeim nung anisüngzüka alitsü, ne madak pai ken tena pelatsi,"

~Zephania 3:17

Asenok ajaki tanur tila temeimtsü taküm ajunger kazüdang temulung nung pelaa bilema memeteti tebang nungi ken adoker alir. Kechiaser iba temeimtsü tanur jakji ngur temulung nung tepela ka aiter, aser iba tepela temulungjang nung mesemi tebang nungi memeteti ken adoker alir. Zephania-i iba kasa tajangshiba indang iba lai nung shisema lir. Zephania-i Tsüngrem ken tena angu masü, saka Zephania-i shinba nung Kibuba pelaseta ken tena angu. Ibai Kibuba asenok den pelasemba tamaitsü. Kodang pa chirtemi Kibuba tsüngdang parnok taküm pa pelatsüsa liteta sayudir Kibuba pelasema ken atener.

Ano kodang Kibubai langka tajung mesüra Pai mulungba mapa tajung ka inyaktsü mulungteter idangji pai ken atener. Kodang Yirusalem asoshi joko tsükchir ket nung nüchi ngudaktsütsü aser joko tepela agi melentsütsü mulungtet idangji Kibuba pelaseta ken aten (3:14-16).

Adianu, Kibuba tepela agi ken tendaktsünür asü?

Kodang asenoki sasademer Kibuba ken atener ta amangdi; kodang asenoki pa külemtsü sentepi odir pa tepela agi ken atener ta amangdi; kodang asenok temeshiba jenjang nung alits? meranger Kibuba pelaseta ken atener ta amangdi. Asenoki tajung inyakba nung Kibuba pelasema ken atener ta amangdi. Tsüngrem jashidaktsür ka masü saka Kibuba ken tendaktsür ka südi.

SARASADEM:

Kibuba Yisu, kü takümi na ken tendaktsür ka südaktsüdi. Ni teti na mulungba nung alitsü merangdi. Amen.



September 18, 2026 aonung Highlands Ranch, Colorado nung aliba Valor Christian High School nung saisapong tembangba sülen tekülem sentong agidang tangokba noksa nung angur.

AO OSHI ANGAZÜKDAK:**TANÜ ANGAZÜKTSÜBA OJANG****Jangjamajang**

(adv) jembiba ama züngzünga maliba, solasochi (flexible character)

* Jangjamajang nisung den tagitsü o mejembitsüla.

Jemjamalem

(v) atalatsüba (mock)

* Asenoki kodang tangar jemjamalema mejembitsüla.



Tir Yimyim

OLONG PAITEP # 7662

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükak ki - (5)
3. Asür mangyimba - (5)
5. Temulung nung shisadang - (5)
8. T ____ lu - (3)
10. Takdang temalen - (9)
11. Tesa ____ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ____ ur - (3)
4. Kiojen yangludak - (6)
6. ____ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ____ adenshi - (4)
14. Tsünösenbongtsü adokdak - (3)

OLONG PAITEP # 7660 TELANGZÜBA**TIPIEN :**

1. Teti, 5. Wamesa, 6. Salem,
2. Yasüing, 10. Sala, 11. Kisen,
3. Bangji, 15. Ainer, 16. Lemtsü,
4. Aong.

LANGTSÜNGLEN :

2. Tila, 3. Tezü, 4. Sangremer,
3. Shisabulu, 7. Yimti, 8. Saku,
9. Jang, 13. Nema, 14. Ango.

NAI-A YA METETTER

Japanese nunger Shin Ohashi-i Asian Games nung 200m breaststroke world record ajatetogo.

Arishi küm 17 tain Ohashi-i 2 minutes 4.83 seconds nung takok angu aser 2023 World Championships nung China nunger Qin Haiyang-i yangluteta aliba otsü ajateta liasü.

Manipur nung mokdang shia anogo nung Rs 25-30 crore akoksar

Imphal, September 26, 2026

(Agencies): Manipur nung mokdang balala aliba ajanga anogo shia tax revenue Rs 25-30 crore shi akoksar ta Chief Minister Y Khemchand Singh-i ashi.

Bishnupur district nung Seva Sankalp Abhiyan sentong nung jembidang 2023 nungi mepetmesü adoka arudang Manipur rongsenketzüng aser government revenue nung kanga mejungi kongshiogo ta CM Khemchand-i ashi.

"Mangatetep aliba onüktem olemtep ajanga angatetteptsü akok anungji nübortemi lungkak

aitba anentsü mepishir" ta pai ashi.

"Manipur kümzüka ayutsü atema jembirtemi hill areas semdangtsüla. Timtem ajuruba tesemtem semdangi mao ser o dang mejembitsüla" ta CM Khemchand-isa ashi.

2023 mepetmesü ajanga kibong aika dak kongshia timtemer. Manipur state Assembly nung jembitepba sülen sorkari rongsenketzüng tsütsü timtem ajurua aliba kibong 3,00,050 shia nem Rs 10,000 agütsütsü lemtetogo ta paisa metetdaksü.

State sorkarisa taküm November ita Ningol Chakouba

festival matongdang women street vendors asoshi special financial assistance scheme ka tenzüksü ta CM Khemchand-isa ashi.

Iba scheme nung tenüng mezüluok aliba women street vendors-i pei pei MLA tem ajanga zülüoktsü akok ta paisa shisem.

Prime Minister Narendra Modi-i küm 25 tashi public service inyaka aruba tenüng nung ita ka piyong Seva Sankalp Abhiyan amunger. Iba sentong ya public service aser good governance tangatetbatem ajungkettsü atema lir ta paisa metetdaksü.

Amit Shah-i October 5 nü Mizoram semdangtsü akok

Aizawl, September 26, 2026

(Agencies): Union Home Minister Amit Shah-i October 5 nü Mizoram semdangtsü aser mapatong aika tenzüksütsü akok.

Mapatongtem rongnung Mizoram state Cooperation Department kübok inyakbatem dena lir ta ketdangsürtemi ashi.

Amit Shah-i semdangtsüba

detailed itinerary ano mangu lir saka maparen tenzükgogo ta ketdangsürtemi ashi.

Iba mapang Union Home Minister Shah-i mapatong aika lapoktsütsü aser item rongnung state Cooperation Department ajanga inyakbatem dena lir ta parnokisa metetdaksü.

Külen, Aizawl Deputy Commissioner Lalhriatpuia-i

October 5 nü Aizawl nung Lengpui aser Youth Recreation Centre tsüingda lenmang tezülen gari anendena mayutsü tetuyuba agütsüogo.

Iba lenmang nung senzürtemi traffic tenokdangba magütsütsüla aser October 5 nü iba lenmang nung aliba petrol pumps ajak shibangtsü ta Aizawl Deputy Commissioner-isa metetdaksüogo.

Tripura nung Sep 28 nü Village Committee elections agitsü

Agartala, September 26,

2026 (Agencies): Tripura State Election Commission (SEC)-i September 28 nü Village Committee elections atema maparen renemogo.

State kübok tesem balala nung polling personnel 7,300 shi ka mapa lezmüksüogo aser security maparen akangshiogo.

"Tripura kübok blocks 44 nung polling stations 1,095 nung polling asütsü. Mezüingbo polling stations 1,550 liasü saka

1,095 nung dang polling asütsü. Iba anogo voters lakh 6.65 shi kati shilem agitsü imlar" ta SEC Secretary Anurag Sen-i ashi.

Polling tiptema agitsü atema Central Armed Police Forces (CAPF) company 74 mapa lezmüksüogo. Parnoki area domination, patrolling aser security measures inyaksü.

Honibarnü blocks ajak nung election materials reprangshimogo aser September 27 anepdang nungi

polling personnel tem pei pei lezmüksüba polling stations-i aotsü ta Sen-i ashi.

Commission-i strong rooms 44 aser counting halls 44 renemogo aser iba ya block shia kaka lir.

Maneni, Tripura nung Urban Local Body elections atema maparen renemdar. Polling stations indang final publication renemogo aser polling stations 738 ajiteta lir ta Sen-isa metetdaksü.

NFR-i Katihar division nung parcel cages yanglur

Dimapur, September 26,

2026 (TYO): Northeast Frontier Railway (NFR)-i stations aser terminals nung parcel maparen tajungba akümtsü meranger aser parnoki modern parcel cages amenoker.

NFR-i Kishanganj, New Jalpaiguri, Siliguri, Haldibari,

Malda Court, Balurghat aser Katihar nung modern parcel cages yanglutsü sentong lir. Parnoki New Jalpaiguri, Katihar, Malda Court aser Balurghat nungbo yangludat aser tanüngba station asem nunga tenzüksü.

Item facilities nung parcels aser luggage kümzüka ayutsü

aser railway staff-i tongtipang station tem nung mapa tajungba inyaktetsü.

Iba ajanga parcel handling akangshitsü aser osettsüset samaba, raksaba mesüra auyaba nungi kümzüksü ta Chief Public Relations Officer Kapinjal Kishore Sharma-i sangdong ka nung ashi.

DR Congo nung Ebola tashidak tesem anati prokshiaogo



Democratic Republic of the Congo nung North Kivu province kübok Butembo tesem nung Ebola treatment centre ka nung mapa inyaker ka personal protective equipment (PPE) semer sanitary basins ka merekba noksa anung angur

Kinshasa, Rongjui/Septem-

ber 26 (Agencies): Demo- cratic Republic of the Congo nung Bundibugyo strain agi poktetdaksüba Ebola tashidak ano health zone tasen anati prokshio, ta World Health Organization (WHO)-i metetdaksü.

Central African Republic den arrtsü nung aliba South Ubangi governorate kübok Bulu tesem nung aser South Sudan den arrtsü nung aliba Haut-Uele province kübok Dungu tesem nung nüburtem dak tashidak putetba WHO-i metetdaksüogo.

Tang tesem ana nung tashidak potetba sülen province 63 kübok health zone 63 nung tashidak prokshia aoba jangjaogo. Ketdangsürtem tashidak azüoktsü atema timtemtepba mapang tang tashidak maneni prokshia odar.

September 23 nü tashi nung Democratic Republic nung nisung 7,890 dak tashidak potetogo aser nisung 3,799 süogo, ta WHO-i metetdaksü. Iba tetezü tashidak menar tesadangshi süatokogo.

WHO Director-General Tedros Adhanom Ghebreyesus-i ashiba agi, mepetmesü aliba aser nüburtem tesem balala nung prokshir aliba ajanga tashidak agi menar alirtem tonga aotsü aser tashidak menar alitsü ta bilemertem bushia aotsü asoshi tetsükdaksü adoker.

"Ebola tashidak azüoktsü atema onoki jenjang agiba ya

linük nung mepetmesü adoker aliba ajanga tetsükdaksü adoker, aser ano nüburtem pei talidak toktsür jenshia aoter aser tesem karibo aotsü makoker," ta Tedros-i ashi.

Bundibugyo strain ya anepalutsü atema tasak, kechiyong iba atema mejeta vaccine ka nguteta mali, ta Tedros-i ashiba den, WHO-i vaccine clinical trials takaraba nung agitsü aser temang anepalutsü atema jenjang agidar, ta shisem.

Kasa mapang nung Bundibugyo strain menar alitsü ta bilemertem bushia aoba mapang health worker tem tetsükdaksü aika adoker aser parnok nukjidong metongteti arudar.

Africa Centres for Disease Control and Prevention (Africa CDC) director-general Dr Jean Kaseya-i ashiba agi, tashidak menar alir 7,000 dak tema puteter aliba tetezü parnok den ajuruteper alir 420,000 shi bo asütsü.

"Ajisüaka tang tashi nung onok ket nung contact list nung nisung 30,000 dang lir," ta Kaseya-isa shisem.

"Tashidak ya lokti nung poktetra iba ya azüoktsü atema mejembittetsü," ta pai ashi.

Northeastern DRC nung Ituri province ya maneni iba tashidak poktetdak teyongtsü lir. May ita iba tashidak potetba meteta aruba sülen iba prov- ince nung nisung 6,032 dak tashidak potetogo, koba taoba

anogo 21 tsüngda nisung 868 dak tashidak potetba densema lir.

Province tem rongnung Ituri province sülen North Kivu nung tashidak menar timba lir. Iba province nung tang tashi nung nisung 1,480 dak tashidak potetogo, kong taoba anogo 21 tsüngda nisung 567 dak tashidak potetba densema lir. Tawa tashidak potetertem aser asürtem ya iba province nungi asemsü lir, ta WHO-i Deobarnü metetdaksü.

North Kivu nung tashidak poteter shilem 60 shi süatokogo, koba national aver- age 48 percent dang nungi timba asüba data ajanga sayuogo.

Medical staff aser shirangertemi kanga menoatokba sülenang health facility tem bushir, aser iba ajanga timtem tali akümer.

"Shirangertemi parnok mozükidangi ora idangjisa temang anepaluba tesemtemi asütsü atema yoktsü ta bilemer," ta Dr Michel Paluku Mukuloli-i ashi, shiba North Kivu kübok Butembo nung mozüki ka nung inyaker.

Tashidak menar alirtem jangjatsü aser tashidak ya mazüokteti maküm tsüngda temang anepalutsü atema inyakyim kanga tebenja lir.

2018-2020 küm iba tashidak potetba mapang province asem rongnung North Kivu ya teyongtsü liasü. Küm asem tsüngda iba tashidak agi nisung aiks süogo. Ajisüaka iba mapang nungbo tashidak ya Zaire strain agi poktetdaksüba liasü.

Bundibugyo strain indang tang tashi nung aikabo meteta mali. Ajisüaka temang anepalurtemi ashiba agi, tashidak menali shirangertem dak tashidak keta aliba kangabo merprangteter aser malaria aser typhoid amala tashidak asütsü ta dang bilemer.

Tashidak mazüokteti prokshia aoba mapang health worker tem kümzüka toktsütsü atema taoba mapang nguteter aliba vaccine tem agütsü tenzüko.

SÜR KÜM KA AJUNGBA MENUNGRA BILEMTETER

Lt. BENDANGWATI AIER



Tasüba Anogo: 27.09.2025

Na onok nungi pilaa tatem makadak limai or küm ka süitema arudang, onoki na menungra bilemteter. Tanü iba anogo onoki na bilemteta sarasadema amunger. Na tanü onok den meliaka ne temeim teti onok mulung nung alitsü. Nai teti meima aliba.

- Temeim kinungtsü, chirnur, semchir aser kinungertem

Taiwan nem prangbong injang agütsütsüji US tejangraba lir: Wu



Deputy Foreign Minister Francois Wu

Taipei, Rongjui/September

26 (Agencies): Taiwan nüjiso kümzüka ayutsü atema United States-i prangbong injangtem agütsüba, aser Taiwan-i alima nem semiconductor tem agütsüba ya US tejangraba ka lir, ta Taiwan nunger diplomat kati Honibarnü ashi. China aser US tir na senden ka amenba sülen pai iba olen lemsatepa liasü.

Tir Donald Trump aser China tir Xi Jinping na anogo asem senden ka amenba Hokolbarnü tembangogo, ajisüaka Taiwan densema tongtibang ken o tem tongpoka moteti senden tembangogo. Beijing-i Taiwan ya parnok meyong ta shia arduar.

Xi-i Bregostibarnü Washing- ton nung Trump dang, US-i Tai- wan nüjiso dak sendakba nung parnok tamendakdak lepa rprangshitsü imlaba lemsatepogo.

Taipei nung osangbenertem den sensaksema mapang Deputy Foreign Minister Francois Wu-i, Taiwan dak sendakba nung US-i haihaura akaba ajanga US tejangraba ataloktsü mataloktsü, ta asüngdang.

Military osetem ayokba aser China kübok malitsü atema Tai- wan pa sasa defend sütettsü atema teyari agütsüba aser Tai- wan indang semiconductor in- dustry-i alima nem maneni teyari agütsütsü atema maneni inyaksangshidaksütsü ya US asoshi tongtibang lir, ta Wu-i ashi.

Taiwan ya AI atema

amshiba advanced chips tem yanglurtem rongnung tulutiba lir.

Trump shibai May ita Beijing nung Xi den ajurutepba sülen Taiwan dang prangbong injangtem ayoktsü atema sentong aliba sota atar ta shiogo, pai Washington nung senden amenba sülen Taiwan dak sendakba nung olen kecha lemsatepa mali.

Taiwan indang National Cheng Kung University nung political science professor Wang Hung-jen-i ashiba agi, summit nung telemtetba agiba ya imlaba dang nungi tajungba liasü, kechiyong Xi-i prangbong injang ayokba indang indang indanga mejembi aser Taiwan dak rangloker semsaksem maka.

Trump administration-i De- cember ita Taiwan dang USD billion 11 alang prangbong injang ayoktsü agizükogo.

Ajisüaka Xi aser Trump na taküm ano APEC aser G20 summit nunga ajuruteptsü lir asünung prangbong injang ayoktsü atema telemtetba agiba ya ano atsülangtsü asü masü mejangja. Wu-i ashiba agi, iba atema sorkari kanga junga meita ata-a alitsü nüngdaker.

China dangi US ambassador David Perdue-i Hokolbarnü CNBC dang ashiba agi, Taiwan dak sendakba nung Trump indang policy memelenshi lir, kong 1979 Taiwan Relations Act densema lir, koba ajanga Taiwan dang prangbong injang ayoktsü asoshi temelaba agütsür lir.



Northwestern Pakistan kübok Dera Ismail Khan nung police checkpoint ka pei temang nung bom alenoker pokdaksürtemi amakba sülen security personnel 11 tepset aser 30 yirutsüogo. Noksa nung bomb apokba tesem sepaitemi meketbanger aliba angur.

NE Regional Muaythai C'ship nung Naga nunger asayartemi takok tajung angu



Dimapur, Rongjui/September 26 (TYO): Ibubaba North-east Regional Muaythai Championship 2026 nung Nagaland Muaythai Team-i takok tajung nguogo. Iba asayamung ya R. Dengthuama Hall, Aizawl, Mizoram nung September 21 nungi 24 tashi asaya liasü.

Iba asayamung nung Nagaland team-i gold 6, silver 2 aser bronze medal 3 ngua liasü.

Muaythai Association of Mizoram-i ayongzüka asayaba iba asayamung ajanga North-eastern state ti nungi asayartem longjemdaksüba den iba tesem nung Muaythai asaya renloka aotsü atema sabang tajung ka agütsüogo. Asayamung nung ajak senteper asayar 350 category 100 shi nung toktepogo, aser Northeast kübok tesem balala nungi technical official temia shilemagia liasü.

Asayamung ya Minister for

Sports & Youth Services, Government of Mizoram Pu Lalnghinglova Hmar-i lapoktsü aser asayamung shibangba sentong nung Mizoram Chief Minister Pu Lalduhoma tongti tejaoker liasü.

Nagaland team nungi Medal angurtem:

Gold angurtem - 6

Lemnon L. Konyak - U-24, 48 kg

Pikato Awomi - U-24, 54 kg

Niuka Chophi - U-24, 60 kg

Aputo - Elite, 48 kg

Wapang Ao - Elite, 51 kg

Emtiramok Amri - Elite, 63.5 kg

Silver medal angurte - 2

Mangkhaio T. Konyak - Elite, 54 kg

Manjei Konyak - Elite, 57 kg

Bronze medal angurtem - 3

Yumahang Limbo - U-16, 57 kg

Huka Ayemi - U-24, 51 kg

Wangtah Konyak - Elite, 71 kg

Total: 11 Medals - 6 Gold, 2 Silver and 3 Bronze.

Asayamung nung Phongmei

Phom-a U-24 67 kg category nung kanga junga asayaogo saka pai medal ka danga mongutet.

Nagaland team ketdangsürtem yamai liasü:

Hemavi Ayemi - National Coach, UMAI

H. Pangmei Konyak - Team Manager

Aboto Ayemi - Team Coach

Aboli M. Kinimi - Assistant

Female Coach

Moakumzüik Longchar -

Referee & Judge.

Iba asayamung nung Nagaland team-i kanga junga shilem agiba ajanga state nungi Muaythai asayartem kanga renloka aoba sayur. Iba asayamung ajanga Northeast nungi asayar aser ketdangsürtem nem tajangshiba tajung angutsü, technical shisatsütem lemsateptsü aser tesendaktep akangshitsü atema maongka agütsüogo.

ISL 2026-27 season October 10 nü tenzüksü

Rongjui/September 26, 2026 (Agencies): Indian Super League (ISL) 2026-27 season October 10 nü tenzüksü. Mezüngbuba anogo Bengaluru FC, Sporting Club Delhi, FC Goa aser Chennaiyin FC nunger asayatsü.

Team 13 asayatsü aliba asayamung mezüngbuba shilem nung asaya 78 asayatsü aser fan tem tejangraba apir asayatem timba hopta tatemi asayatsü.

Asayamung mezüngbuba shilem nung asaya 53 Hokolbar, Honibarnü mesüra Deobarnü asayatsü.

Mezüngbuba anogo Bengaluru FC pur Sporting Club Delhi den Sree Kanteerava Stadium nung nikongtsütsü 5 ako nungi tenzüka asayatsü aser FC Goa o Chennaiyin FC na Fatorda Stadium nung aonung 7:30 nungi tenzüka asayatsü.

2026-27 ISL nung asayatsü aliba team tem ya Bengaluru FC, Chennaiyin FC, Churchill Brothers, East Bengal FC, FC Goa, Inter Kashi, Kerala Blasters FC, Mohun Bagan Super Giant, Mumbai City FC, NorthEast United FC, Odisha FC, Punjab FC aser Sporting Club Delhi ta alitsü.

Taruba season nung fixture aser venue tasena alitsü, kong mezüngbuba ISL Goa Derby Churchill Brothers aser FC Goa

na December 13 nü Fatorda Stadium nung asayatsü aliba densema lir.

League ya Manipur nunga asayatsü. November 24 nü NorthEast United FC aser Sporting Club Delhi na Khuman Lampak Stadium, Imphal nung asayatsü.

Defending champions East Bengal FC-a mezüngbuba asaya October 18 nü Churchill Brothers den Fatorda Stadium nung asayatsü.

East Bengal mezüngbuba hopta masayatetsü, kechiyong parnok AFC asayatsü lir.

East Bengal FC aser Mohun Bagan Super Giant na tsüngda Kolkata Derby ya November 29 nü Vivekananda Yuba Bharati Krirangan nung asayatsü.

November 7 nungi November 20 tashi FIFA international window mapang ISL masayatsü aser iba ajanga asayartem pei national team nungi asayatsü asoshi maongka agütsütsü.

Asayamung mezüngbuba shilem ya October 10 nungi taruba küm January 17 tashi asayatsü.

Temaba jenjang nung tembangba team trok playoffs-i aitsü aser iba atema mapangtong nung sangdongtsü.

Inter Kashi indang home ground-a club-i jangjatsüba sülen sangdongtsü.

Asian Games: India tebur Kabaddi team-i gold medal angu



Asian Games nung India nunger tebur Kabaddi team-i gold medal ngur pelatepba noksa nung angur.

Rongjui/September 26, 2026 (Agencies): Pawan Sehrawat-i aniba India tebur kabaddi team-i Honibarnü final nung 2018 champions Iran team koka tang agi tekubenbuba Asian Games nung gold medal nguogo, koba otsü tasen ka asütsü.

Gold medal atema asaya nung India team-i kanga meranga asayarang Iran team ya 40-34 agi koka liasü.

1990 küm Asian Games nung mezüngbuba tebur kabaddi asaya tenzüka sülen India-i 2018 küm dak alaka asayamung ajak nung gold medal nguogo. 2018 küm India team-i medal ka danga monguteti pezübuba nung tembanga liasü.

2026 Asian Games nung India team-i Group A nung

mezüngbuba asaya nung Japan 49-24 agi akok. Tanabuba asaya nung parnoki South Korea 63-31 agi akok, tasembuba asaya nung Bangladesh 48-25 agi akok aser tatembangbuba asaya nung Chinese Taipei 37-21 agi koka liasü.

Semifinal nung India-i 66-28 agi Thailand koka final nung Iran den asayatsü asoshi maongka nguteta liasü. Iran-ia semi nung Chinese Taipei 59-21 agi akok.

India team-i gold medal mangu tsüngda tetsür team-ia final nung Iran team 37-34 agi koka gold medal ngur liasü.

Kasa asayamung nung Asian Championships gold medallist Abhay Singh-i Honibarnü tebur kija squash asaya nung Pakistan nunger asayar Muhammad Irfan 3-0 agi

ayonga ayonga koka final-i iogo aser medal kabosa angutsü jangjaogo.

Semifinal asaya ya Abhay-i kanga junga tenzüka aser mezüngbuba game nung pa yakta dang 6-2 agi tejakdang aküm aser iba sülen pai manen asaya amokbanger asaya-a asaya akok.

Tanabuba game nungbo Pakistan nunger asayar yagi Abhay nongshia asaya, saka paisa asaya akok, aser tasembuba game-a pai ayong ayonga koka final tongtetogo.

"Asaya kanga tasakbo masü asü. Asaya mela mela asayatsüsa ni junga asayatet ta bilemer, saka ni kü opponent nem akümtsüba agütsür. Asian Games nung asaya ka danga temelabo masür," ta Abhay-i ashi.

Hardik India A team nungi ano masayatetsü

Rongjui/September 26, 2026 (Agencies): Hardik Pandya asaya tenzüksütsü atema ano tetsükdaksü adokogo. Pa India A team nungi Australia A den October 6 nü nungi tenzüka Puducherry nung asaya asem asayatsü aliba nung shilem magitettsü.

Pandya ya iba hopta tetenzüklen tetsüng tachichilem temin nung tashiba ka ajangshiba sülen scan süshia liasü. Pa anepalua aliba BCCI medical team-i pa ano mapang tatsüka anisüngzüksü tetuyuba agütsüogo.

Arishi küm 32 tain asayar ya asaya tenzüksütsü ana nung liasü, saka pa temin nung maneni timtem adokba ajanga BCCI Centre of Excellence nung ita ishika mung temang anepaluba amajok kümdaksüogo.

Kasa timtem ajanga pa Afghanistan den T20Is asaya atema meshim. Pa ya Asian Games tatemlen danga asayadaksütsü atema asadanga liasü, saka tia maka

tang ano yirushiogo. Pa Afghanistan den ODI aser T20I naprongla nung masayatet.

Pa taruba anogo 10 nungi 15 tashi temang arakzüa kecha minyaksü alinung taruba ita New Zealand den T20 asayatsü aliba nunga asayatetsü masayatetsü mejangja.

Asayar shimertemi NZ den ODI asayatsü atema pa kanga kümdanga asadangerang shimtsü imlar, koba T20I asayamung sülen asayatsü.

Team management iba nungtugu asayar asaya tenzüksütsü kanga yongya atadar, saka pa taneptsü kanga junga mongui masayadaksütsü ta angateter, kechiyong taruba küm ODI World Cup ya ajak dang tongtibangtiba lir.

Ken o dak sendakba nung Indian cricket board-i kecha osang agüja mali. Ajisüaka Suryansh Shedge tang BCCI CoE nung training agidar aser India A asaya asem atema Hardik melen pa shimtsü akok.

BILEMDANGANG

"Azümesenba ajanga sensak tia tentetdaksür."